

UPSI pusat penyelidikan, pendidikan Keluarga Malaysia



UPSI berperanan dalam meningkat, mempromosi serta menyebarkan konsep dan usaha membudayakan nilai pengkayaan Keluarga Malaysia.

BH - 9/12/2021 m/s: 2

Tanjung Malim: Pusat Penyelidikan dan Pendidikan Keluarga Malaysia akan ditubuhkan di Universiti Pendidikan Sultan Idris (UPSI), selari jolokannya sebagai institusi ulung yang membawa perubahan dalam pengembangan pendidikan.

Perdana Menteri, Datuk Seri Ismail Sabri Yaakob, berkata menjadi harapannya agar pusat berkenaan berupaya menginstitusikan 'Keluarga Malaysia' dengan menjadi hab penyelidikan, pendidikan, latihan dan penyebaran ilmu dalam kalangan rakyat.

Ismail Sabri juga yakin, dengan kreativiti, inovasi dan kolaborasi strategik membabitkan pelbagai pihak dengan pusat berkenaan dapat memainkan peranan signifikan dalam meningkat, mempromosi serta menyebarkan konsep dan usaha membudayakan nilai pengkayaan Keluarga Malaysia.

"Uniknya, institusi pengajian tinggi seperti UPSI ini dilatari

kepelbagaian agama, bangsa, usia dan latar belakang ekonomi. Bagi merentasi hari, kita memerlukan semangat serta nilai kekeluargaan. Umpama aur dan tebing; tiada aur, runtuhlah tebing.

"Tuntasnya, persekitaran ini membentuk keluarga baharu kepada pelajar dan di sinilah lahirnya idea untuk membentuk Keluarga Malaysia @ IPT.

"Aura Keluarga Malaysia dilakar melalui kerjasama yang harmoni, sikap saling menghormati dan keterbukaan pelajar terhadap perbezaan," katanya ketika merasmikan Program Keluarga Malaysia@IPT 2021 di UPSI di sini, semalam.

Yang turut hadir, Menteri Pengajian Tinggi, Datuk Seri Dr Noraini Ahmad; Menteri Besar Perak, Datuk Seri Saarani Yaakob; Menteri Tenaga dan Sumber Asli, Datuk Seri Takiyuddin Hassan dan Timbalan Menteri Pendidikan I, Datuk Dr Mah Hang Soon.